

**Sanaartornermi neqerooruteqartitsisarneq pillugu
Inatsisartut inatsisaata allanngortinnejarnissaa
pillugu Inatsisartut inatsisaat
(Aningaasanut killigititassanik iluarsiineq, atuuffinnik
erseqqissaaneq, siumoortumik
neqerooruteqartitsinani aamma
isumaqatigiiffiusumik neqerooruteqartitsinani
suliariu-mannittussarsiuussisarnissamik
piumasaqaatit pillugit aalajangersakkat,
siumoortumik nalunaaruteqartarnissamik
atuutsitsilerneq kiisalu
Neqerooruteqartitsisarnermut Maalaaruteqartarfik
pillugu aalajangersakkanik atorunnaarsitsineq)**

§ 1

Sanaartornermi neqerooruteqartitsisarneq pillugu Inatsisartut inatsisaanni nr. 11, 2. december 2009-meersumi, Inatsisartut inatsisaatigut nr. 4, 15. april 2011-meersukkut aamma Inatsisartut inatsisaatigut nr. 18, 22. november 2011-meersukkut allannguiteqartinneqartumi allannguutissat uku aalajangersarneqarput:

1. § 1, imm. 2, nr. 1 imatut oqaasertalerneqassaaq:

"1) Kalaallit Nunaanni Namminersorlutik Oqartussat, ingerlatseqatigiiffit aalajangiisarnermi Kalaallit Nunaanni Namminersorlutik Oqartussat sunniuteqarfigisaat kiisalu kommunini oqartussaasut ingerlatseqatigiiffillu, aalajangiisarnermi kommunit sunniuteqarfigisaat."

2. § 1, imm. 3, nr. 2 imatut oqaasertalerneqassaaq:

"2) Namminerisamik inissialiortiternerit, inissianut aningaasalersuisarneq pillugu Inatsisartut inatsisaat naapertorlugu taarsigassarsinissamik neriorsuuteqarfiusut."

3. § 8, imm. 1 immikkoortuisa aappaanni "300.000 koruunit" imatut allanngortinneqassaaq: "500.000 koruunit".

4. § 13-imi imm. 2-tut ivertinneqassaaq:

"*Imm. 2. Aammattaaq killilimmik siliariumannittussarsiuussinerit siumoortumik neqerooruteqartitsiviunngitsumik ingerlanneqarsinnaapput, nunap immikkoortuani pissutsit peqquaallutik entreprenørít najugaqartut kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamut § 25 a, imm. 4 naapertorlugu aggersaasoqarsimatillugu.*"

5. § 20 imatut oqaasertalerneqassaaq:

"**§ 20.** Neqerooruteqartut, § 1, imm. 2-mut ilaatinneqartut sanaartugassanut siumoortumik neqerooruteqartitsinermik pissarsiniarsinnaanngillat, matumani pineqanngippata:

- 1) sanaartugassat katillugit 1.500.000 koruuninik taakkuluunniit inorlugit nalillit,
- 2) sanaartugassat annertussutsimikkut, pitsaassutsimikkut piffissalluunniit ingerlanissa eqqarsaatigalugu ajornakusoortorujussuarmik neqerooruteqartitsinissamut tunngavissat aqqutigalugit aalajangersarneqarsinnaasut, soorlu misiliilluni suliat, ilisimatusarnerit ineriertortitsinerillu ilaat imaluunniit iluarsartuuussinerit, iluarsaassinerit allanngortitsinerillu, suliassalluunniit isumannaallisaaneq eqqarsaatigalugu kinguartinneqarsinnaanngilluinnartut,
- 3) siliariumannittussarsiuussinermi neqeroorummik, tassungalu ilangullugu aningasaqarnermut peqqussutiluunniit malillugit naleqquttumik tigusisoqarsimanngippat, imaluunniit aallaqqammut neqerooruteqartitsinermi piumasaqaatit annertuumik allannguuteqarsimatinnagit siumoortumik neqerooruteqartitsinissaq pillugu allagarsiinermi qinnuteqaatinik tigusaqartoqarsimanngippat,
- 4) nunami pissutsit pissutsilluunniit allat peqquaallutik suliffeqarfitt aalajangersimasut pingasut tikillugit kisimik sanaartugassanik suliaqarnissamut periarfissaqarpata, aammalu § 25 a, imm. 4 naapertorlugu isumaqtigifiusumik neqerooruteqartitsinissamut aggersaasoqarsimappat, imaluunniit
- 5) pissutsit aalajangiisuuussat immikkut ittut allat peqquaallutik entreprenørímk aalajangersimasumik toqqaasoqartariaqarpata."

6. Kapitali 6-ip kingorna ivertinneqassaaq:

"Kapitali 6 a
Siumoortumik nalunaaruteqartarnerit

§ 25 a. Neqerooruteqartitsisup siumoortumik nalunaaruteqarnermigut, suliassat imaluunniit suliassat taakku ilaannit ilaasa suut neqerooruteqartitsisup neqerooruteqartitsiviginiarnerai saqqummiussinnaavai. Siumoortumik nalunaarut tusagassiorfitsigut imaluunniit tusagassiorfiit elektroniskiusut aqqutigalugit allagarsiinikkut tamanut ammasumik saqqummiunneqassaaq.

Imm. 2. Suliassanut ataasiakkaanut siumoortumik nalunaarut suliassaq siliaritinniagaq pillugu allaaserisamik naatsumik, kiisalu suliassap siliarineqartussap sumiinneranut aammalu piffissamut suliassap aallartiffissaatut naatsorsuutigineqartumut allagarsiinerusinnaasunullu paasissutissanik imaqassaaq.

Imm. 3. Siumoortumik nalunaarut taamaallaat suliassanut, ullormit siumoortumik nalunaarutip tamanut

ammasumik saqqummiunneqarfianit naatsorsorlugu neqerooruteqartitsisup sivisunerpaamik qaammatit 12-it iluanni neqerooruteqartitsivigitissallugu pilersaarutigisaanut atuutissaq.

Imm. 4. Neqerooruteqartitsisup siumoortumik neqerooruteqartitsinani aamma isumaqtigiiifiusumik neqerooruteqartitsinani suliariumannittussarsiuussisarnissami, neqerooruteqarnissamut soqutiginnittunik aggersaanikkut siumoortumik nalunaaruteqartarneq atorsinnaavaa. Siumoortumik nalunaarut neqerooruteqartitsisup suliassamut aalajangersimasumut neqerooruteqartitsinermik aallarniinssaa kingusinnerpaamik sapaatit akunnerinik arfineq pingasunik sioqqullugu tamanut ammasumik saqqummiunneqassaaq, taannalu suliassat suut ilaatinneqarnersut, sumiiffik aammalu isumaqtigiiissutip naammassinissaanut piffissaq, kiisalu soqutiginnittut saaffiginninnissaannut piffissaq killiliussaq pillugu paassisutissanik imaqassalluni.

Imm. 5. Neqerooruteqartussat, imm. 4 naapertorlugu siumoortumik nalunaaruteqarnissamut piffissaliussap naannginnerani soqutiginninnerminnik saqqummiussisut neqerooruteqarnissamut qinnutigineqarsinnaapput, tamatumali saniatigut tamatumunnga inatsisitigut piumasaqaateqarsinnaanatik.

Imm. 6. Imm. 4 naapertorlugu siumoortumik nalunaaruteqarneq pillugu maalaaruteqarnissamut, ullormit siumoortumik nalunaarutip saqqummiunneqarfianit piffissaq maalaaruteqarfiusussaq sapaatit akunnerinut sisamanut killilerneqarpoq, Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni § 5, imm. 1 malillugu.”

7. § 26 imatut oqaasertalerneqassaaq:

” § 26. Inatsisartut inatsisaat manna, imaluunniit maleruagassat, Inatsisartut inatsisaat manna naapertorlugu aalajangersarneqartut naapertorlugit aalajangiinerit Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni maleruagassat naapertorlugit maalaarutigineqarsinnaapput.”

8. §§ 27-34 atorunnaarsinneqassapput.

§ 2

Inatsisartut inatsisaat manna 1. januar 2021-mi atuutilissaaq.

Namminersorlutik Oqartussat, ulloq 26. november 2020

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut